



**LAPORAN LIPUTAN MEDIA HARIAN
AHAD 16 JULAI 2023**

BIL	TAJUK KERATAN AKHBAR	KEMENTERIAN / JABATAN / AGENSI
1.	KPKM SASAR JUALAN AGRO MADANI DI 5,000 LOKASI, HM -ONLINE	KEMENTERIAN PERTANIAN DAN KETERJAMINAN MAKANAN (KPKM)
2.	PROGRAM SMART SBB MINI SEKINCHAN MADA-BERNAS DIPERLUAS, SH -ONLINE	

UKK KPKM

UNIT KOMUNIKASI KORPORAT
KEMENTERIAN PERTANIAN DAN KETERJAMINAN MAKANAN
(UNTUK EDARAN DALAMAN KPKM, JABATAN DAN AGENSI SAHAJA)

TARIKH	MEDIA	RUANGAN	MUKA SURAT
16/7/2023	HARIAN METRO	ONLINE	

KPKM sasar Jualan Agro Madani di 5,000 lokasi



Georgetown: Kementerian Pertanian dan Keterjaminan Makanan (KPKM) menyasarkan pelaksanaan Jualan Agro Madani di 5,000 lokasi di seluruh negara membabitkan nilai jualan sebanyak RM39 juta pada tahun ini.

Menterinya Datuk Seri Mohamad Sabu berkata, pihaknya turut menyasarkan penyertaan 46,000 usahawan di seluruh negara.

Katanya ia susulan kejayaan program itu yang mencatat nilai jualan RM17.7 juta setelah diadakan di 643 lokasi hingga 9 Julai lepas membabitkan 10,143 usahawan dan memberi nilai penjimatan RM5.3 juta kepada 1.28 juta isi rumah.

"Pelaksanaan Jualan Agro Madani ini dilihat sebagai antara program *quick win* KPKM dalam membantu pengeluar memasarkan produk mereka secara terus kepada pengguna dan pada masa sama dapat mengurangkan kos sara hidup rakyat terutama dalam komponen makanan melalui harga penjimatan yang ditawarkan," katanya kepada pemberita di sini, hari ini.

Beliau ditemui selepas merasmikan Program Jualan Agro Madani Tanjung di pekarangan Prangin Mall, di sini.

Ia turut dihadiri Timbalan Menteri Pendidikan yang juga Ahli Parlimen Tanjung Lim Hui Ying.

Mohamad berkata, fokus Jualan Agro Madani di seluruh negara pada tahun ini adalah untuk menjamin ketersediaan bekalan agromakanan dan memberi pilihan kepada pengguna mendapatkan bekalan agromakanan pada harga yang berpatutan.

Katanya, melalui jualan itu juga, komoditi jualan diperluaskan meliputi produk segar dan barang kawalan dengan penjimatan 10 hingga 30 peratus lebih rendah berbanding harga pasaran termasuk sayur, buah-buahan, ayam, telur, ikan dan daging.

"Antara fokus lokasi bagi Jualan Agro Madani ini adalah di kompleks atau premis kerajaan, *outlet* peruncitan agensi di bawah KPKM, Projek Perumahan Rakyat (PPR), kawasan perumahan, kawasan miskin bandar dan pinggir bandar.

"KPKM juga merancang untuk memperluaskan program jualan itu pada tahun depan bagi memberikan lebih penjimatan kepada pengguna, bukan kita bersaing dengan peniaga di luar tetapi nak bantu isi rumah mendapatkan barang keperluan lebih jimat hingga 30 peratus," katanya.

Program Jualan Agro Madani adalah penjenamaan semula kepada program Jualan Terus Dari Ladang (JTDL) yang dilaksanakan oleh KPKM melalui Lembaga Pemasaran Pertanian Persekutuan (Fama), Lembaga Pertubuhan Peladang (LPP) dan Lembaga Kemajuan Ikan Malaysia (LKIM).

Program Smart SBB Mini Sekinchan MADA-Bernas diperluas



Mohamad (dua dari kiri) cuba menjual seekor ayam bersama sayur-sayuran dengan harga RM10 pada program Jualan Agro Madani@Tanjong di pekarangan Pragin Mall pada Ahad. - Foto Bernama

GEORGE TOWN - Kementerian Pertanian dan Keterjaminan Makanan (KPKM) yakin pelaksanaan Program Smart SBB Mini Sekinchan MADA-Bernas mampu

meningkatkan pengeluaran padi beras tempatan dan mengurangkan import makanan ruji itu di negara ini.

Menterinya, Datuk Seri Mohamad Sabu berkata, program itu mampu meningkatkan pengeluaran padi iaitu 7 tan hingga 10 tan per hektar untuk setiap penanaman padi berbanding kira-kira 5 tan pengeluaran padi sebelum ini.

"Projek perintis itu dijalankan di Perlis membabitkan kawasan lebih 100 hektar sejak Mei lepas dan dijangka 2 September nanti hasil padi mula dituai, berdasarkan pemantauan dan pemeriksaan kita mendapati tanaman padi tersebut dalam keadaan baik serta elok seperti di Sekinchan, Selangor.

"Mungkin kita boleh dapat hasil hingga 10 tan padi bagi setiap hektar di situ (Perlis), ini bukan sahaja dapat menambah pendapatan pesawah, malah juga dapat tingkatkan pengeluaran padi kita dan dalam masa sama ia boleh mengurangkan import beras, itu yang kita mahu sebenarnya," katanya kepada pemberita di sini pada Ahad.

Beliau ditemui selepas merasmikan Program Jualan Agro Madani Tanjung di pekarangan Prangin Mall, di sini yang turut dihadiri Ahli Parlimen Tanjung Lim Hui Ying yang juga Timbalan Menteri Pendidikan.

Mengulas lanjut, Mohamad berkata, KPKM merancang untuk memperluas Program Smart SBB Mini Sekinchan MADA-Bernas itu ke beberapa negeri lain iaitu Kedah, Terengganu, Kelantan dan Pahang dalam masa terdekat ini.

Katanya, konsep yang diperkenalkan melalui program berkenaan membabitkan pertanian pintar dengan penggunaan peralatan moden bagi meningkatkan kuantiti dan kualiti hasil padi.

Beliau berkata, komponen pertanian pintar ini juga membabitkan penggunaan jadual kerja ladang lebih tersusun, baja tambahan dan pematuhan waktu aplikasi baja serta racun yang lebih tepat bagi memastikan keberkesanan terhadap pokok-pokok padi secara optimum.

"Pelaksanaan inisiatif itu adalah dengan kerjasama sebuah syarikat peneraju SMART SBB iaitu Padiberas Nasional Bhd (Bernas) yang bertindak sebagai pengurus projek dan penyedia perkhidmatan serta penyeliaan penggunaan baja serta racun mengikut pertanian kontrak bersama pesawah terlibat.

"Selain itu, kita harap pihak Institut Penyelidikan dan Kemajuan Pertanian Malaysia (MARDI) dapat mengeluarkan lebih banyak varieti padi supaya dapat digunakan untuk penanaman menerusi program tersebut," katanya. - Bernama